

**KHUTBAH KHAS GERHANA BULAN
JABATAN MUFTI NEGERI PAHANG**

8 NOVEMBER 2022 M

13 RABI'UL AKHIR 1444 H

الْحَمْدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ. وَنَعُوذُ بِاللَّهِ مِنْ شُرُورِ أَنْفُسِنَا وَمِنْ سَيِّئَاتِ أَعْمَالِنَا.

مَنْ يَهْدِهِ اللَّهُ فَلَا مُضِلَّ لَهُ وَمَنْ يُضِلَّهُ فَلَا هَادِيَ لَهُ.

وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ

صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.

أَمَّا بَعْدُ،

فَيَا عِبَادَ اللَّهِ، اتَّقُوا اللَّهَ أَوْصِيكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

Marilah kita bersama-sama meningkatkan ketakwaan kepada Allah Subhanahu wa-Ta'ala dengan melaksanakan segala perintah dan meninggalkan segala larangan-Nya. Mudah-mudahan kita diberkati Allah Subhanahu wa-Ta'ala di dunia dan akhirat.

Muslimin dan Muslimat yang dirahmati Allah Subhanahu wa-Ta'ala,

Marilah kita sama-sama bertasbih, bertahmid dan bertakbir kepada Allah Subhanahu wa Taala, Tuhan yang menggerakkan bumi, bulan dan matahari, dan mentakdirkan berlakunya gerhana bulan penuh.

Sekarang ini, sedang berlaku gerhana bulan di tempat kita. Bulan purnama yang sepatutnya cerah dan bersinar mengambang, kelihatan gelap sebahagian permukaannya kerana bayang-bayang bumi. Pada ketika ini, bumi berada sebaris antara bulan dan matahari.

Di negeri Pahang, kita hanya dapat menyaksikan sebahagian fasa akhir gerhana bulan kerana ia telah bermula sebelum Maghrib tadi, dan bulan masih baru terbit dan rendah di kaki langit timur.

Muslimin dan Muslimat yang dirahmati Allah Subhanahu wa Taala,

Bagi umat Islam, fenomena gerhana ini merupakan bukti kekuasaan Allah Subhanahu wa Taala. Betapa telitinya aturan falak hingga memungkinkan fenomena yang menakjubkan ini berlaku bagi meluruskan akidah umat Islam dalam mengenal Tuhan Yang Maha Pencipta. Melalui gerhana bulan, kita bertambah yakin betapa Allah Subhanahu wa Taala yang menentukan aturan manazil bulan. Firman Allah Subhanahu wa Taala dalam Surah Yasin ayat ke-39 hingga 40:

أَعُوذُ بِاللَّهِ مِنَ الشَّيْطَانِ الرَّجِيمِ

وَالْقَمَرَ قَدَرْنَاهُ مَنَازِلَ حَتَّىٰ عَادَ كَالْعُرْجُونِ الْقَدِيمِ ﴿٣٩﴾ لَا الشَّمْسُ يَنْبَغِي

لَهَا أَنْ تَدْرِكَ الْقَمَرَ وَلَا اللَّيْلُ سَابِقُ النَّهَارِ وَكُلٌّ فِي فَلَكٍ يَسْبَحُونَ ﴿٤٠﴾

Yang bermaksud: *“Dan bulan pula Kami takdirkan dia beredar melalui beberapa peringkat, sehingga di akhir peredarannya kelihatan kembalinya pula ke peringkat awalnya - (berbentuk melengkung) seperti tandan yang kering. (Dengan ketentuan yang demikian), matahari tidak mudah baginya mengejar bulan, dan malam pula tidak dapat mendahului siang; kerana tiap-tiap satunya beredar terapung-apung di tempat edarannya masing-masing.”*

Muslimin dan Muslimat yang dirahmati Allah Subhanahu wa Taala,

Semasa zaman Nabi Muhammad Sallallahu Alaihi Wasallam, pernah berlaku gerhana matahari, kebetulan pada hari yang sama wafatnya putera baginda yang bernama Ibrahim. Terdapat sebahagian mereka yang mendakwa kononnya kematian itu disebabkan oleh gerhana matahari yang berlaku. Lalu Baginda Sallallahu Alaihi Wasallam menjelaskan, seperti yang diriwayatkan dalam Sahih Bukhari :

إِنَّ الشَّمْسَ وَالْقَمَرَ آيَاتَانِ مِنْ آيَاتِ اللَّهِ، لَا يَنْخَسِفَانِ لِمَوْتِ أَحَدٍ
وَلَا لِحَيَاتِهِ، فَإِذَا رَأَيْتُمْ ذَلِكَ فَادْعُوا اللَّهَ وَكَبِّرُوا، وَصَلُّوا وَتَصَدَّقُوا

Yang bermaksud: *“Sesungguhnya matahari dan bulan adalah dua tanda daripada tanda-tanda kebesaran Allah Subhanahu wa Taala. Kedua-duanya tidak gerhana dengan sebab kematian atau kelahiran seseorang. Sekiranya kamu melihat gerhana, maka berdoalah kepada Allah Subhanahu wa Taala, bertakbirlah, solat dan bersedekah.”*

Muslimin dan Muslimat yang dirahmati Allah Subhanahu wa Taala,

Sesungguhnya fenomena astronomi seperti gerhana bulan ini, akan lebih mendidik jiwa kita supaya mengenal Tuhan yang mentadbir alam. Bagaimana Allah Subhanahu wa Taala berkuasa untuk menukar kenampakan bulan mengambang, tiba-tiba bertukar gelap akibat ditutupi bayang-bayang bumi. Adakah wujud kuasa lain yang mampu menukar aturan ini?

Dengan sebab itu, elakkanlah diri kita daripada mengaitkan fenomena gerhana ini dengan perkara khurafat, menilik nasib, untung dan rugi dalam kehidupan. Sebaliknya, renunglah betapa berkuasanya Allah Subhanahu wa Taala, Tuhan sekalian alam. Firman Allah Subhanahu wa Taala dalam Surah Yunus ayat 5:

هُوَ الَّذِي جَعَلَ الشَّمْسُ ضِيَاءً وَالْقَمَرَ نُورًا وَقَدَرَهُ مَنَازِلَ لِتَعْلَمُوا عَدَدَ السِّنِينَ

وَالْحِسَابَ مَا خَلَقَ اللَّهُ ذَلِكَ إِلَّا بِالْحَقِّ يُفَصِّلُ الْآيَاتِ لِقَوْمٍ يَعْلَمُونَ ﴿٥﴾

Yang bermaksud: “Dia-lah yang menjadikan matahari bersinar-sinar (terang-benderang) dan bulan bercahaya, dan Dia-lah yang menentukan perjalanan tiap-tiap satu itu (berpindah-randah) pada tempat-tempat peredarannya masing-masing) supaya kamu dapat mengetahui bilangan tahun dan kiraan masa. Allah Subhanahu wa Taala tidak menjadikan semuanya itu melainkan dengan adanya faedah dan gunanya yang sebenar. Allah Subhanahu wa Taala menjelaskan ayat-ayat-Nya (tanda-tanda kebesaran-Nya) satu persatu bagi kaum yang mahu mengetahui (hikmat sesuatu yang dijadikan-Nya).”

Muslimin dan Muslimat yang dirahmati Allah Subhanahu wa Taala,

Nabi Muhammad Sallallahu Alaihi Wasallam mengajak para Sahabat untuk mendirikan solat sunat Khusuf sepanjang berlakunya gerhana. Diriwayatkan juga bahawa Baginda telah diperlihatkan dalam solat itu, akan nikmat kehidupan di syurga dan pedihnya azab api neraka. Dengan sebab itu, Rasulullah Sallallahu Alaihi Wasallam berpesan dalam khutbah gerhana, seperti yang diriwayatkan dalam Sahih Bukhari:

وَاللَّهِ لَوْ تَعْلَمُونَ مَا أَعْلَمُ لَضَحِكْتُمْ قَلِيلًا وَبَكَيْتُمْ كَثِيرًا

Yang bermaksud: “*Demi Allah, kalau kamu tahu apa yang aku tahu (daripada azab api neraka), nescaya sesungguhnya kamu akan sedikit sahaja tertawa, dan akan banyak menangis.*”

Muslimin dan Muslimat yang dirahmati Allah Subhanahu wa Taala,

Bersempena dengan terzahirnya salah satu tanda kekuasaan Allah Subhanahu wa Taala menerusi gerhana bulan sekarang, marilah kita bersama-sama memperbanyakkan amal ibadah, bertakbir, berdoa dan bersedekah, seperti yang dianjurkan oleh Nabi Muhammad Sallallahu Alaihi Wasallam. Bertafakurlah sejenak dan tadaburlah ayat-ayat kebesaran Allah Subhanahu wa Taala ini, agar subur jiwa kita dengan tunjang akidah yang tulen, jauh daripada kepercayaan karut marut khasnya terhadap kuasa lain selain Allah Subhanahu wa Taala. Ketika matahari, bulan dan bumi sentiasa taat kepada perintah-Nya, janganlah pula kita mengingkari arahan Allah Subhanu Wa Taala.

أَعُوذُ بِاللَّهِ مِنَ الشَّيْطَانِ الرَّجِيمِ

وَمِنْ آيَاتِهِ اللَّيْلُ وَالنَّهَارُ وَالشَّمْسُ وَالْقَمَرُ لَا تَسْجُدُوا لِلشَّمْسِ وَلَا لِلْقَمَرِ

وَأَسْجُدُوا لِلَّهِ الَّذِي خَلَقَهُنَّ إِن كُنتُمْ إِيَّاهُ تَعْبُدُونَ ﴿٣٧﴾

بَارَكَ اللهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ
وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ، أَقُولُ قَوْلِي
هَذَا وَأَسْتَغْفِرُ اللهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ،
وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا فَوْزَ الْمُسْتَغْفِرِينَ وَيَا نَجَاةَ النَّائِبِينَ.